

四庫全書

子部

欽定四庫全書

子部
道德指歸論卷六
四至

詳校官侍郎_臣謝墉

檢討_臣何思鈞覆勘

總校官庶吉士_臣朱 鈐

校對官中書_臣高 中

謄錄監生_臣范廷驊

欽定四庫全書

道德指歸論卷四

漢 嚴遵 撰

含德之厚篇

道德虛無神明寂泊清靜深微太和滑淖聽之寂寞視
之虛易上下不窮東西無極天不能裹地不能囊規不
能員矩不能方度不能度而量不能量金玉不能障蔽
水火不能壅落萬物莫之能領禍患莫之能作沈浮翺
翔渾沌磅礴心無所棲形無區宅陶冶稟授萬天以作

羣物得之滋滋啞啞知慮不能得有為不能獲思之愈
遠為之益薄執之不我擒縱之不我釋唯無欲者身為
之宅藏之於心故曰含德夫德之在人猶父母之於身
也其於萬物猶珠玉之與瓦鉛也是以含德之士重身
而輕天下猶慈父孝子不以其有易其鄰大身而細物
者猶良賈察商不以珠玉易瓦鉛也其無欲也非惡貨
而好廉也天下之物莫能悅其心也其為虛也非好靜
而惡擾也天下之事莫足為也夫何故哉所有重而天

下輕也明於輕重之稱通於利害之變故萬物不能役而天下不能徭也故不為虛而虛自起不為靜而靜自生不休神而神自定不和氣而氣自平是以不聽而聞無聲之聲不視而見無形之形不思而領是非之意不慮而達同異之鄉神淪天地德遵陰陽不請福而天地祐之不辭禍而患害去之不殺戮而天下畏之不施與而天下愛之鼓腹而樂俯仰而娛食草而美飲水而甘喬木之下精神得全巖穴之中心意常欣貧樂其業賤

忘其卑窮而恬死困而忘危功與地配德與天齊反愚
歸昧比於嬰兒是故建身為國誠以赤子為容則是天
下尊道貴德各重其身名勢為垢萬物為塵貪夫逃爵
殘賊反仁積柔集弱唯德是修而作福生亂者有何由
然悲夫天地之道深以遠妙以微能誠之者寡行之者
希智慧不能得唯赤子為體之夫赤子之為物也知而
未發通而未達能而未動巧而居拙生而若死新而若
弊為於不為與道周密生不生之生身無身之身用無

用之用聞無聞之間無為無事無意無心不求道德不
積精神既不思慮又無障截神氣不作聰明無識柔弱
虛靜魂魄無事樂無樂之樂安無欲之欲生不枉神死
不幽志故能被道含德與天地同則蜂蠆蟲蛇無心施
其毒螫攫鳥猛獸無意加其攫搏骨弱筋柔握持堅固
不睹牝牡陰陽以化精神充實人物並歸啼號不嗔可
謂志和為之行之與道為常執之守之時曰聰明自然
生息動合百祥心意互作氣順堅強無所為故無所不

克無所欲故動無所作自然通達衆美萌生天地愛祐
禍亂素亡夫何故哉以含德和神而體童蒙也及其有
知也去一而之二去晦而之明身日飾而德日消智逾
多而迷益深故重天下而輕其神貴名執而賤其身深
思遠慮離散精神背柔棄弱力進堅剛陷於欲得溺於
求生開於危殆塞於萬全故福如天地視而不能見禍
若雷霆聽而不能聞出無入有日造禍殃動而之窮為
而之亡脩身愛國為國不祥祭燎而天地是伐禱祀而

鬼神是喪非命之罪事物自當也

知者不言篇

道無常術德無常方神無常體和無常容視之不能見
聽之不能聞既不可望又不可捫故達於道者獨見獨
聞獨為獨存父不能以授子臣不能以授君猶母之識
其子嬰兒之識其親也夫子母相識有以自然也其所
以然者知不能陳也五味在口五音在耳如甘非甘如
苦未苦如商非商如羽非羽而易牙師曠有以別之其

所以別之者口不能言也故無狀之狀可視而不可見也無象之象可效而不可宣也無為之為可則而不可陳也無用之用可行而不可傳也故得道之人見之如子之識親履之如地戴之如天被之服之體之如身為之行之與之浮沈與之臥起與之屈伸神與化游志與德運聰明內作外若聾盲思慮互起狀若癡狂故口不能言而意不能明也譬猶夢為君王履危臨深憂喜相反中心獨然覺而道之不能以喻其鄰也失道之人則

不然見其外不覩其內識其流不獲其源秉其末不窮其根然其所以然不然其所不然故道在於外不在於身中主不定守不固堅心孤志疑情與物連聰明眩耀以偽為真若是若非若亡若存和氣易動若病在人陽泄神越惡默好言方言之時心有所慮志有所思聰明並外精神去之音聲內竭外實有餘道德離散日日遠之言之益疾而已愈不見造之益衆而已愈不知是故言者逆道之要也而距德之數也反天之匠覆地之具

也是故得道之士損聰棄明不視不聽若無見聞閉口
結舌若不知言挫其銳釋其所之意無所守廓似無身
解其所思散其所慮奄若不知匿若獨存滅禍無首反
於太素容貌不異服色不詭因循天地與俗變化深入
大道與德徘徊無言以言言無為以為為清靜以治已
平和以應時與世渾沌與俗玄同要物之本秉事之根
獨與衆異天下莫聞遊於親疎之戶翱翔利害之門浮
於貴賤之野固守我之精神遁隱無形之境放佚荒蕩

之鄉貧賤不以為辱富貴不以為榮欲隱而隱欲彰而彰陰陽不能損益人主不能蔽明魁然獨立卓爾無雙聲色不能悅五味不能甘萬物不能與之爭知力不能與之訟無取無與無得無去閉門杜戶絕端滅緒神明為制道為中主動與化隣靜與然交和順時得故能長久佚蕩無常莫能先後故好之不能近惡之不能遠賞與不能加賦稅不能取爵祿不能高貧賤不能下無柰萬物何故萬物不能侵無以天下為故天下不能有也

以正治國篇

道德之情正信為常變化動靜一有一亡覆載天地經緯陰陽紀綱日月育養羣生逆之者死順之者昌故天地之道一陰一陽陽氣主德陰氣主刑刑德相反和在中央春生夏長秋收冬藏終而復始廢而復興陽終反陰陰終反陽陰陽相反以至無窮故王道人事一柔一剛一文一武中正為經剛柔相反兵與德連兵終反德德終反兵兵德相保法在中央法數相叅故能大通是

以明王聖主損欲以虛心虛心以平神平神以知道得
道以正心正心以正身正身以正家正家以正法正法
以正名正名以正國正國綱紀分明察理元元本本牽
左連右參伍前後物如其所正名以覈實審實以督名
一名一實平和周密方員曲直不得相失賞罰施行不
贏不縮名之與實若月若日一名正而國家昌一名奇
而國家役養國之密無有所常屈伸取與與時俱行繼
亂任法遭遂任兵守平以道體德為常大小相遇以正

相望失正則化之不從則禁之不止則制之不伏則伐之若夫小國迫於大國之間遭無道之君以正事之不可則去之去之不可則割地而予之予之不可則率衆而避之避之不可則杖策而遁之遁之不可則患及萬民禍將及我故奮計而圖之是爭之所為起而兵之所為生也吾欲選將練士砥礪甲兵積糧高壘營而自守百姓靡弊國家空虛是戰之所為作也而正之所為興也吾欲以正入則我寡而彼衆我弱而彼強如卵投石

為敵受殃三軍必敗士卒死傷天心不得宗廟滅亡下
悲萬民之命上畏天地之心是權之所為動也而奇之
所為運也故建往反之計招覆來之事開萬民之心生
諸侯之謀明我道德之祐開我天地之助以渾四海之
心同萬國之意百姓應我若響鄰國隨我若影飛鳥走
獸與我俱往是計之所為用而奇之所為行也上順道
德之意下合天地之心危寧利害視民若身體無形之
形處太陰之陰發無為之為揚無聲之聲異彼滅化之

罪明彼逆天之功顯天之所降見地之所生有名無實
有實無名名實相違或正或傾縱橫反覆合於冥冥天
災自起妖孽自生離其父子絕其弟兄殺其雄將戮其
忠臣天下怨恨莫與同心魁然獨立受天之兵戰勝大
喜四海安寧此用奇之上也愔天下之怒積能奇之人
飛耳游目延聰益明游士四達結友合親生息變怪因
道應姦飾權養勢以實其民飛言僞事以惑敵人卑辭
降下以閉其君輕使重利以開其臣君臣有隙因制其

神變作於陰權動於微懸其死命因其樞機使敵狂惑
不得有為隨時進退無有常儀不攻而敵自詘不戰而
敵自危尅其君不及其臣誅其將不及其師戰勝民喜
諸侯畏之此用奇之次也制其地形御其君臣卑體重
賞以順其外陰謀雲布以亂所親姦從彼來道從此興
數城而封將連國以予姦姦來如鬼謀計如神方畧不
測奇變不窮分彼之力疑彼之心如出於地若生於天
離其左右散其相連起權生變以制其死阻其計謀使

不得信折其強輔以孤其志因形立勝如環無端乘時而發和之為恒動攻其害靜絕其糧褫而奪之飢而渴之重而累之水而火之勞而苦之凍而暍之利而誘之狂而惑之卒而迫之窘而薄之從高擊下以衆制寡堅校部曲官隊相伍上護其下下求其上三軍相保親如父子奇陣分合隱伏叅處營前經後凌左敗右耀以旌旗惑以金鼓進如波騰退如風雨發如崩潰合戰如虎守不可攻攻不可守戰勝威行天下大恐此用奇之下

也禍亂既夷萬物豐寧天心大得宇內欣欣藏奇損智
忠信為務清靜簡易退事止言夫何故哉道德變化無
所不生物有高下指嚮不同趨舍殊謬或西或東各推
其性以活其身吉人以善足凶人以惡傳誠人以信顯
邪人以偽容各効其知以避禍凶求而不瞻智者詐生
勞而不息忠者起姦拘迫慘怛信者馳謾窮困不已賢
者不仁故主好智則民偽主好利則民禍主好賞則民
困主好罰則民怨何則事由於主行之在臣賞出於主

財出於民法出於主受之在臣主有所欲天下嚮風故
用心思公不若無心之大同也有欲禁過不若無求之
得忠也喜怒時節不若無為之有功也思慮和德不若
無事之大通也明於俞跗之術岐鵠之數以治之不若
使世無病之德豐也挾黃帝太公之慮秉孫吳氏之要
以勝之不若使天下不事智力之不營也故道德之所
生愛不能利也天地之所成為不能致也唯無愛者能
利之唯無為者能遂之是故明王聖主無欲無求不創

不作無為無事無載無章反初歸朴海內自寧何以明
之莊子曰夫起福生利成功遂事構物致用使人大富
天下奢僭財貨不足民人愈醜福滿山澤金玉成積國
愈不安民益少利飾智相愚以詐相要防隄邪淫姦偽
之路密分別同異是非之變衆則國家昏而政事衰作
方遂伎雕琢文彩奇變異怪以褒有德以別尊卑巧故
滋起俊出愈奇令速賞深罰峻刑嚴鑿肌膚斷四肢疏
遠不隱親近不和罪至夷滅賞至封侯天地振慄盜賊

愈多故聖人之言云我無為而民自化夫何故哉主者
天下之心也氣感而體應心動而身隨聲響相應形影
相隨不足以為喻是故人主誠為無為之為則天下之
心皆無所之被道含德無思無求無令無法萬民自化
人主誠能事無事之事則天下無效無象無知無識不
賞不與萬民自富人主誠能安無靜之靜樂無清之清
則天下不學不問無聞無見無刑無罰萬民自正人主
誠能欲不欲之欲則天下心虛志平大身細物動而反

正靜而歸足不拘不制萬民自朴故人主之政不孝不仁不施不予閔閔縵縵萬民恩輓墨墨僣僣好惡不別是非不分故得所欲性命以全人主之政布德施利明目察察萬民昭昭皆知禍福孝悌仁義萬事差別惶惶儼儼知偽缺缺故失所安性命夭絕福生於禍禍生於福福之與禍同營異域俱亡俱存異情同服相隨出入同來異極非有聖人莫能獨得故去福則無禍無禍則無福無福之福至微玄默天下好智莫能窮極唯無為

者能順其則正在禍福之間無所不剋失正則竒生竒生而民惑善人為妖是非反覆天下大迷而不復也

方而不割篇

道無不有而不施與故萬物以存無所不能而無所為故萬物以然何以明之夫道體虛無而萬物有形無有狀貌而萬物方圓寂然無音而萬物有聲由此觀之道不施不與而萬物以存不為不宰而萬物以然然生於不然存生於不存亦明矣故王者興師動利則民欲民

欲而以方方則割以割為方則邪者進而方者退忠臣
蒙其毒萬民受其害貴貨則民求民求而以廉廉則剋
以剋為廉則貪者顯而廉者蔽忠臣蒙其咎而萬民受
其敗開爭則民曲民曲而以直直則肆以肆為直則枉
者翱翔直者深伏忠臣蒙其禍萬民受其敗上好名則
民偽民偽而以光光則耀以耀為光則大德隱而小惠
章忠臣蒙其死而萬民受其殃數者以施貨流情通所
以謂方者不方廉者不廉直者不直光者不光名繆實

易正失德亡人主獨立臣下雙身養主之意阿主之心
塞主之聽蔽主之明此國之所以危而宗廟之所以喪
也是以明王聖主獨有而不與也獨知而不教也獨能
而不使也方於已而不以也廉於物而不有也直秉天
心而不恃也德光四海而不怙也夫何故哉去福以方
使下自公割於不割使民不訟事情自達萬物以通莫
為之吉莫為之凶天下蕩蕩莫云其常非不割也割剥
伐擊誅驕制暴而無癥創也去貨以廉使下自平剋於

不劇使人無爭貪叨者息潔白自生莫之為濁莫之為清名不虛諡實不倚傾非不劇也善廉美讓章含顯盜而辨無藏也去爭以直使下自剋肆於不肆使民自伏匡邪振亂化淫矯俗莫之為禍莫之為福天下荒荒萬物自得非不肆也舉正揚直表過章惡貶邪削枉明人之失天下盡正而動無聲也去名以光使下自當耀於不耀使民自明莫之為照莫之為冥天下渾渾萬物資生德與天比化與道同非不耀也德光四海照萬物而

化無形也上下相象中表相應出入無朕往來無間若影之與形響之與聲故治國之道生民之本嗇為祖宗是故明王聖主損形容卑宮室絕五味減聲色智以居愚明以語默達無狀之容立無象之式恐彼知我藏於不測故未動而天下應未命而萬民集未戰而素勝之未攻而天下服是以不勤勞而民有功不分爭而得其職不刑戮而萬民畏不微鈔而得天福禍亂不生羣祥並集無為而無不成不爭而無不克故萬物玄同天下

和洽浮沈軋輳與道相得若終而始若亂而紀虛而實
無而有疏而密遲而疾無形影無根朕彷彿渾沌莫知
所以獨知獨見獨為獨不變化無常畜積無府陰陽離
合屈伸張弛冥冥窅窅芒昧玄默魁如天地不可窮極
自修有餘故能有國治人理物子孫不絕夫何故哉以
其嗇也為嗇之道不施不予儉愛微眇盈若無有誠通
其意可以長久形小神大至於萬倍一以載萬故能輕
舉一以物然與天同道根深蒂固與神明處真人所體

聖人所保也

治大國篇

日昃陰生燥至風起谿谷小動海波大興高以相臨差以百尋者以其形大故也千仞之岸萬丈之崖物類登之崖隕下顛蚊蚋螻蟻適足以游翔而犀象虎豹之糜骸者以其形重也飄風隆盛發屋折木石鐵飛揚山陵崩弛而人血脉不為之傷者以其暴大也隙穴之風不動鬢眉及其中人也生百病而成死亡者以其纖芥也

夫大國者江海犀象之徒也而德化者飄風隙穴之類也故其福不可大生也其利不可暴興也其善不可大處也其惡不可大喪也大生之則大亡暴興之則暴傾大處之則大去大喪之則大至何以明之莊子曰夫飢而倍食渴而大飲熱而投水寒而入火所苦雖除其身必死胷中有瘕不可鑿喉中有疾不可剝也蜚蜚著面不可射也蟣虱著膚不可斫也何則欲除小患而生大賊也是以明王聖主之治大國也若柄纖微若通小水

若察秋毫如聽無有若亡若存若非若是如行如留如
為如休為在為不為之域化在有無有之野福微利鮮
言希禁寡動於無形功流四海夫何故哉以道為父以
德為母神明為師太和為友清靜為常平易為主天地
為法陰陽為象日月為儀萬物為表因應為元誠信為
首殊分異職繩繩玄默引總紀綱舉大要而求之於已
是以民如胎穀主如赤子智偽無因而生巧故無由而
起萬物齊均莫有盈損和洽順從萬物豐茂鬼神與人

合而俱市動於自然各施所有寂如無君泊如無鬼萬
物盡生民人盡壽終其天年莫有傷夭主若不仁鬼若
不神主非不仁也兼施博愛德運六合而無阿憐也鬼
非不神浮於恍惚載於纖微經歷萬方與時變化神全
萬物不以傷人也非不傷人聖人在上與天相叅人物
順比大化流行知故不作奇物不生莫之為滿莫之為
盈天下喁喁萬物齊均既不起高又不造深不攻金石
不壅水泉人不遠徙食不熟生世皆可賞莫之可刑草

木黃而後落人化盡而後終是故天之所胞地之所函
太一之所生天一之所將四時所歸五行所監羣臣毒
害變化運行各有分部不得相干周流萬物莫之可傷
是故鬼神治陰聖人治陽治陰者殺偶治陽者殺奇虛
無清靜鬼神養之纖微寡鮮鬼神輔之盛壯有餘鬼神
害之盈滿亢極鬼神殺之不屬其類聖人奉之忠信順
善聖人與之雄俊豪特聖人察之作變生奇聖人殺之
故動於陰者鬼神周之動於陽者聖人制之唯無所動

者莫能敗之聖人在上奇不得起詐不得生故鬼以其
神養物於陰聖人以其道養物於陽福因陰始德因陽
終鬼神降其澤聖人流其恩交歸萬物若性自然流道
沈德洽和同真

大國篇

天地並起陰陽俱生四時共本五行同根憂喜共戶禍
福同門故所以為寧者所以為危者也而所以為危者
所以為寧者也所以為存者所以為亡者也而所以為

亡者所以為存者也何以明之夫虎豹以其形容脩廣
爪牙堅強肌膚盛大毛物豐文章明故執百獸而制於
人榮華香草以其所有光曜芬香故悅於衆俗而傷其
根大國之君以其地廣民衆勢尊形寵威隆名顯故張
其鄰國而危其身有道則固於磐石寧於太山失道則
危於累卵輕於鴻毛俱弱則先困俱亂則先亡是故大
國者霸王之梯而亡滅之階也是以大國之君獨立無
偶名山四塞三面成阻鴻川並流萬物浮下為諸侯較

膏腴之府强大之尸權勢之主偕不測之固要阨狹之口肥饒廣易方數千里珍寶竒怪無所不有民鮮徭役牛馬從處舟輿萬數兵食陵衆居者安樂過者留止人如草木畜滿山野耕桑田獵得獲深倍故天下之所欲歸將相之所欲附車騎奮擊帶甲百萬處易守險形便地利順天而攻順地而守懸人之命制人之死與之則有勢背之則失宗廟故諸侯之所欲交天下之所畏也施道足以并兼尊寵足以發號伐之足以崇仁治之足以明義兼之足

以廣地得之足以為富故諸侯之所好而將相之利也是故自古及今天下之牝以靜勝牡千世不易萬世不變夫何故哉以虛受實以無應有不以為大務以為小不以為高常以為卑也是故明王聖主之處大國也施而不以置下而不以求地裏諸侯之國而無所不畏德包諸侯之力而無所不事折節下之以附人意忠廉誠信以先士吏割地東西以招賢俊疾耕力織以裒畜積結縱連橫以戒不虞發倉庾散財幣養耆老食孤寡振

窮達困顯巖穴之士受而不取授而不予柔弱簡易無
為而處諸侯雖有貪鄙殘賊驕矜恃力不好順從欲圖
逆者猶以文武之勢威德之重靜而下之則彼修身慎
行改過自新割地獻寶歸命殺身請為子弟之國藩牆
之臣其處小弱也因道而動修理而行富以舟輿實以
甲兵忠順誠素尚朴貴耕耕織有分不取民有上下和
集親如父子君如腹心民如形體國專和一可與俱死
上下順從可與鄰市大國之君雖負衆強上權右勢左

德下仁心如飢虎怒如湧泉不好施予常欲吞人猶以
得天之心獲民之意將相誠信鄰人之助發源泉之敵
揚不測之威辱身厚體竭誠懸命款款惓惓事以清靜
彼神感精喻心釋意壞怒移禍徙與我為妖上而取人
者形大勢豐德博權重人之所利也下而取於人者地
狹民少權重德鮮人之所易也故不戰而壞人之邑不
攻而降人之城地廣號尊宗廟顯功德流是大國之所
期也友於大國接和結親歲有災害則大國憂之鄰國

難至則大國求之屈一人之下伸萬人之上社稷尊宗
廟顯國富兵強人物全濟延於無窮小國之所願也故
接地鄰境懸權不動先下先得卑者制倨靜者勝躁處
大之勢小下大得夫何故哉自然之道不可強制水動
流下人動趨利釋下任事衆弱為一出於不意此强大
之所以亡也故大宜下之

道德指歸論卷四

欽定四庫全書

道德指歸論卷五

漢 嚴遵 撰

萬物之奧篇

木之生也末因於條條因於枝枝因於莖莖因於本本
因於根根因於天地天地受之於無形華實生於有氣
有氣生於四時四時生於陰陽陰陽生於天地天地受
於無形吾是以知道以無有之形無狀之容開虛無導
神通天地和陰陽寧調四時決萬方殊形異類皆得以

成變化終始以無為為常無所愛惡與物大同羣類應之各得所行善人得之以翕以張清靜柔弱默默沌沌仁宛和淖潤澤虛平大小周密纖微無形玄達萬事以歸無名終始反覆萬福自生動得所欲靜失所患在人之上威德自明攻堅勝大莫與為雙凶人得之以發以張堅剛以疎實動以先驕溢以壯夫盛滿以強極廣脩大以無彊照察察以熒熒顯的的以彰彰彊大終小不禍自生動失所欲靜得所傷心憂志削乃反正常神氣

煩促趨翕去張鬱約而辭卑拘制而體降迫險而賓伏
慘怛而忠信改容而易節與君子同罪定而言善臨死
而愛身一奉天數變性易情安貧樂困卑賤為常尊天
敬鬼視人如王上比牛馬下列犬羊天網以發自然不
聽吁嗟痛哉為戒甚明二者殊途皆由道行在前在後
或存或亡故言行者治身之獄也時和先後大命之所
屬也是以君子之立身也如喑如聾若撲若質藏言於
心常處玄默當言深思發聲若哭和順時適成人之福

應對辭讓直而不飾故言滿天下而不多振動四海而
不速連接萬物而不有辭動天下各得所欲其經世也
氣志宵冥而形容隱匿居如驚恐貌似不足俸俸謬謬
消如冰釋遇時而伸遭世而伏與天同憂中心惻惻計
畫不行隨時反側謙虛止足卑損自牧樂下如水久而
不忒下之又下之至於無極天下應之故能有國夫何
故哉人之情性樂尊寵惡卑耻損之而怨益之而喜下
之而悅止之而鄙古今之通道而人心之正理也賢者

既然小人尤甚是故尊美言行事無患矣古之將民何棄之有桀紂之吏可令順信秦楚之卒可令順善故能得其心天下可有不得其意妻妾不使何以効其然也夫爵尊天下富有四海威勢無量專權擅柄人之所畏也去徒步離卒伍鴻舉龍興起佐天子發道揚德施行所有恩流萬姓光顯祖考人之所利也以人之所畏求人之所利言不美行不敬雖執大璧操珍物而進之安車駟馬而載之則是賢者之心疑惑下否玄聖深隱君

子不來言行修於內則神氣踰於外無有駟馬之勞實
壁之費海內之士響應風起俊雄英豪輻至蜂止聖人
下之朝多君子古之所以貴此道者夫何故哉言順天
地而不以行合人心而不恃名成而不顯功遂而不有
情性自然不以為取將以順道不以為已萬物歸之為
天下宰

為無為篇

神明之數自然之道無不生無有不生有不無不有乃

生無有由此觀之憂不生憂喜不生喜不憂不喜乃生
憂喜故居禍者得福居福者得禍禍福之主在於無首
為之無形聽之無聲無形聲則深遠故無功之功大而有
功之功小有德之德薄而無德之德厚是以聖人不
為有不為無不為死不為生游於無有之際處於生死
之間變化因應自然為常故不視而明不聽而聰扶安
天地飾道養神提挈萬物帝國治民解情釋意俱反始
真不為生業不為起事不加以仁不施以利教以不能

導以無識絕民所樂以順民情縱民所惡以得民意也
出天傷之戶入長生之路翱翔玄冥優游太素昧昧芒
芒莫知其故敦若昏晦天下無事味之於無味察之於
無形故能分同異之類明是非之情為之未有定之未
傾勇功不見智名不稱福不得起禍不得生無福之福
興於無聲無禍之禍息於無名主安民樂天下太平故
生患而憂之長福而求之戮君而死之辱父而讐之造
難而折之作亂而滅之召寇而殺之招逆而伐之勇功

見而與天違智名興而與道反動而民悅者勞而德小
為而民喜者為而恩少是以忠信沮壞正事消亡自然
伏竄知故翱翔竊功者顯偷權者彰暴亂者利邪偽者
昌是非覆逆天下大傾物失其命家國以喪故善除患
者不若無患之大也起事致治者不若默然者之貴也
是以君子動未始之始靜無無之無布道施德變化於
玄怒於不怒言於不言攻於不敢守於無端威於不武
報怨未萌圖難於易治其本根絕之未兆使不得然事

不秋毫功如太山為大於細治之繇繇敬而慎之若始
若新不為所欲不求所便常與事反獨守其元與時俱
益日進無彊雖欲不大事物自然是故大難之將生也
猶風邪之中人未然之時慎之不來在於皮毛湯熨去
之入於分理微箴取之在於藏府百藥除之入於骨髓
天地不能憂而造化不能治夫大事之將興也猶水之
出於山也始於潤濕見於漣漣綿綿涓涓流為溪谷汨
汨湯湯濟舟漂石以成江海深大不測是以聖人之建

功名也微故能顯幽故能明小故能大隱故能彰志在
萬民之下故為君王威振宇內四海盡匡懸命受制莫
有能當德與天地相參明與日月同光故言多諾者事
衆而信不可然也心多所易者難積而變不可推也是
以聖人心默而不動口默而不言目默而不視耳默而
不聽動如天地靜如鬼神不為而成不言而信進則無
極退則不窮身無纖介之憂國無毛髮之患夫何故哉
危於不危亡於不亡昭然獨見運於無形

其安易持篇

未疾之人易為醫也未危之國易為謀也萌芽之患易事也小弱之禍易憂也何以效之莊子曰任車未虧僅子行之及其傾覆也顛高隨谷千人不能安卵之未剖也一指麾之及其為蜚鴻也奮翼凌雲曾繳不能連也胎之新乳也一繩制之及其為牡也羅網不能禁也虎也執羣獸食牛馬劍戟不能難也故漣滴之流久久而成江海小蛇不死化為神龍積微之善以至吉祥小惡

不止乃至滅亡是故繼體之君無怨無惡將相和一百
姓賓伏鄰國交市無有讒賊平易不動上下和集當此
之時守之不用威持之不用力無為無事莫之能克及
至國家將危萬民將殆患害將興萌而未兆當此之時
安危在已不在於彼謀之不必聖人憂之不必力士正
之於枕席而患禍已亡矣及至人君失道大臣怨懟鄰
國不市百官衰廢禍患已生小弱柔毳當此之時賢人
深謀生事起執未動而患危不加而禍碎及至人君失

正大臣謀誤鄰國怨恨百姓猶豫患禍已起根本未據
姦雄將興未得人助或合而不結或結而不固當此之
時尊賢下衆折肝膽聽微諫求過於已患心不怨謀士
底兵未發而散故禍福作於無名存亡生於微妙二者
雲錯變動風號屈伸波渾進退殽亂聽之不可聞視之
不可見機巧不能事智慧不能判是故聖人化之以道
教之以身為之未有治之未然不置而物自安不養而
物自全動與福同室靜與禍異天宵宵冥冥莫覩其源

治之未亂正之未傾禁奸之本制偽之端閉邪之戶塞
枉之門萌芽未動形兆未生絕之未見滅之未存教以
無教道以無名知以無知狀以無形治不得起亂不得
生天下無為性命自然夫太山之木本據於陰末託於
陽垂枝布葉華實青青大而合抱高連百尋者生於無
大成於不為九重之臺廣大擬於丘陵百仞之高昭昭
冥冥干於青霄者以為卑小不為高大也故為大者不
大為小者不小為高者不高為卑者不卑不大不小乃

生大小不高不卑乃生高卑故為之者不為之跡也不為者為之塗也是以為成者敗為利者害為生者死為興者廢執所欲者所欲亡執所思者所思逝執其身者其身歿執其神者其神退故聖人無為為之以生萬物無執執之以制所欲猶工匠之造高臺而天地之生巨木自然而已夫道德不嫉神明不賊和無不通大無不克存亡自從吉凶自得人窮事敗者釋自然而任智力去其反而處其覆夫何故哉以求所求而欲所欲夫誠

能慎終如始為所不欲守所不處動於未元反於未始
為若不為有若不有雖若不成物自然也夫使神擾精
濁聰明不達動失所求靜喪所欲者貨與學也唯能鍊
情易性變化心意安無欲之欲樂無事之事者道與德
也是故想道如念親惡貨如失身思無思之思求無求
之求明白四達以學不知巧雕萬物以學不能反衆人
之所務而歸乎虛無欲不欲而造虛玄學不學而窮妙
極達人之所不能通窮人之所不能測成人之所不能

為有人之所不能得心志玄玄形容睦睦卧如死尸立
如槁木不思不慮若無所識使物自然令事自事空虛
寂泊身無所與萬物紛紛各如其處魁如阜褐澹如巨
表舉措廢置常與物反萬物應之故能深遠天下大覆
與神運轉輔天助地不敢生善

善為道者篇

道德神明清濁太和天地人物若末若根數者相隨氣
化連通逆順昌衰同於吉凶道德之意天地之心安生

樂息憎惡殺傷故命聖人為萬物王利物受其福不利則獲其恐聖人大懼恐後有患深原所由莫善自然自然之福要在無形何以明之莊子曰夫天地不知道德之所為故可為然也萬物不覩天地之所以故可存也萬民不識主之所務故可安也四肢九竅不論心之所導故可全也夫萬物之有君猶形體之有心也心之於身何後何先流行血脉無所不存上下表裏無所不然動與異事虛以含神中和外否故能俱全是以昔之帝

王經道德紀神明總清濁領太和者非以生知起事開
世導俗務以明民也將以塗民耳目塞民之心使民不
得知歸之自然也是以立民於昭昭而身處乎混冥教
以不知導以無形孝悌不顯仁義不彰君王無榮知者
無名無教之教洽流四海無為之為通達八方動與天
地同節靜與道德同容萬物並興各知其所名實俱起
各知其當和氣流通宇宙童蒙無知無欲無事無功心
如木土志如死灰不覩同異不見吉凶故民易治而世

可平也是故安者民之所利也生者民之所歸也民之
所以離安去生而難治者以其知也民知則欲生欲生
則事始事始則功名作功名作則忿爭起忿爭起則大
姦生大姦生則難治矣故以知為國則天下智巧詐偽
滋生奇物並起嗜欲無窮奢淫不止邪枉纖纖豪特爭
起溪谷異名大禍興矣臣惑其主子亂其父以白為黑
以亡為有名變實異劫殺生矣恍恍不可安易易不可
全卷甲輕舉海內相攻死者無數血流成川悲痛怨恨

氣感皇天星辰離散日月不光陰陽失序萬物盡傷山
枯谷竭赤地數千天下窮困至於食人非天之辜上好
智能而教萬民也廢棄智巧玄德淳朴獨知獨慮不見
所欲因民之心塞民耳目不食五味不服五色主如天
地民如草木巖居穴處安樂山谷飲水食草不求五穀
知母識父不覩宗族沌沌俸俸不曉東西男女不相好
父子不相戀不賤木石不貴金玉叢生雜處天下一心
八極共旨九州同風蠢蟲不作毒獸不生神龍與人處

麟鳳游於庭翔風噓噓醴泉涓涓甘露漠漠朱草榮榮
嘉禾豐茂萬物長生非天之福主知不知而名無名也
是以覩知識愚與道同符知智與道同旨政教由
之或病或利明於病利太平自至明於利病萬物自正
是故愚智之識無所不免清天寧地為類陰福衆庶莫
見故曰玄德玄德深矣不可量測遠矣不可窮極與物
反矣莫有能克玄德之淪罔蕩軼遁恍惚無形反物之
務和道德導神明含萬國總無方六合之外毫釐之內

靡不被德蒙仁以存性命命終天年保自然哉

江海篇

道德不生萬物而萬物自生焉天地不含羣類而羣類
自託焉自然之物不求為王而物自王焉故天地億萬
而道王之衆陽赫赫而天王之陰氣漻漻而地王之保
者穴處而聖人王之羽者翔虛而神鳳王之毛者蹠實
而麒麟王之鱗者水居而神龍王之介者澤處而靈龜
王之百川並流而江海王之凡此九者不為物主而物

自歸焉無有海式而物自治焉不為仁義而物自附焉
不任智力而物自畏焉夫何故哉體道合和無以物為
而物自為之化是故江海之王也非積德政累仁愛流
神明加恩惠以懷之又非崇禮義廣辭讓飾智故設巧
能以悅之也又非出奇行變起權立勢奮武揚威重生
累息百事以制之也清靜處下虛以待之無為無求而
百川自為來也百川非聞海之美被其德化歸慕之也
又非拘禁束教有界道畫東西而趨之也然而水之所

以貫金觸石鑽崖潰山馳騁丘阜以赴隨江海無有還者形偶性合事物自然也由此觀之卑損之為道大矣百害不能傷知力不能取不戰而強不威而武默然無為與萬物市夫溪谷為卑不為東西故能達而不窮江海處下不為廣大故能王而不休是以明王聖主之欲尚民也以自然之性盛德之容恩卑辭敬比於庶人視身如地奉民若天昭然獨知而不可測卓爾獨能而不可源深察博達而不可塞聰明並流而不可壅不以役

物反以後民故民履之如地託之若神常在民上王土配天其欲先人處窮寵東至尊長生久視樂以無患則去志無身以安萬民身勞而民佚身後而民先在上而民以生在前而民以安民以生故戴之而不以為重民以安故後之而不以為患是以天下推而上之引而先之喜而不倦樂而不厭故聖人之王也非求民也民求之也非利民也民利之也非尚民也民尚之也非先民也民先之也故能極敝通變揀衰匡亂以至太平上配

道德下及神明淪唐唐含冥冥馳天地騁陰陽夫何故哉以去心意而後其身也是故不爭之德因人之力與道變化與神窮極唯棄知者能順其則故王事自然不得妄起得之全命持之有理聖知有性治之有道失其理則王事不成去其道則性情不則是以聖人信道不信身順道不順心動不為己先以為人無以天下為天下爭為之臣

天下謂我篇

物有同而異有異而同有非而是有是非此君子之
所以無患而衆庶之所以憂悲也何以效之莊子曰夫
日月之出入也同明人之死生也同形春秋之分也同
利玄聖之與野人也同容通者之與閉塞也同事道士
之與赤子也同功凡此數者中異而外同非有聖人莫
之能明是以天下嫌疑炫耀結構紛謬是非是以聖人
似不肖夫何故哉得道之士外亡中存學以變情為以
治已實而若虛渾渾冥冥若無所以容䟽言訥貌樸而

鄙情達虛無性通無有寂泊無為若無所止遁名逃世
與神臥起執道履和物無不理不合時俗與天地友衆
人僭為以直為醜殊途異指謂之病矣夫小人則不然
博學多識以釣智名異行顯功以疑仁賢詐世治俗飾
辭盛容卑體阿順以揄愛恩先指承意以獲衆心朋黨
相結多挾賊人勞鮮而祿重功寡而爵尊國貧而家富
主微而身貴勤權生變竊乘盛勢名號隆盛震動境外
憍奢暴逆縱恣不制順心而卑情忤而奪動喪民命靜

生物穢張目而物傷開口而民害此時俗之所榮而世
之所謂肖者也若然者道德所離神明所去天地所憎
陰陽所惡物類不比民人不附動無所不終靜無所不
得生為患害死為福喜衆俗迷妄漫以相導所患者微
其日甚久故得道之士則不然體虛積慈視物如已檢
形促容歸於纖微玄默託後不為物先合和順理以應
自然動靜與衆反出入異門戶不以勇勇故不怒而天
下恐不以廣廣故不施而天下往不以先先故不言而

天下長是故出慈入勇出儉入廣釋後且先反和逆神
動違自然福與之遠禍與之隣大命以絕神氣散分天
地不能安道德不能存臨死不覺怨命尤天非命薄也
非人賊也安憍樂勢廢道而尚力也夫慈之為行也甚
和以真動得人力靜合天心卑損弱小為萬物君匡世
救俗和順天人戰不可敗守不可攻夫何故哉天地並
生變化無窮方戰之日地為之動天為之震天降變怪
地出風盲鬼神並見為敵起殃祐我將相助我萬民怒

我士卒以至羣生牛絕其紉馬絕其糧飛禽拊翼獸下
而行虎兕可戰攫鳥可將敵人驚恐伏甲受兵故賢佐
聖將之立身也不強不大不堅不剛柔弱畏武敵即消
亡戰則損心外意崇體和平辭小託後動靜應天不以
愠起怒不以武興兵其欲勝敵常以反行計運無形以
收敵神動因彼之所有變因彼之所為反之覆之以處
其奇故使彼邪我正彼言我聽彼怒我喜彼動我靜開
其所利以利其命用人則下之以言示之以利陳之以

誠使之自至是以不爭不求以得民意以順民心秉其
要忌彼人離散而我順比敵欲不亡而不能我欲不存
而不得當此之時道為之無德為之始神明為經太和
為紀清濁為家萬物為子三光為佐四時為輔靜為物
根動為化首物類託之無有患咎德與天齊久而不殆
自今及古聖智之道變化終始自天而王皆由此矣

道德指歸論卷五

欽定四庫全書

道德指歸論卷六

漢 嚴遵 撰

用兵篇

道無不有有無不為體和服弱括囊大威生育羣類莫有能違無有形象為萬物師得之者安失之者危天地體之久而不衰何以效之莊子曰夫陰而不陽萬物不生陽而不陰萬物不成由此觀之有威無德民不可治有德無威宗廟必傾無德無威謂之引殃遭運時變身

死國亡故人主者國之腹心也兵者國之威神也夫天地之間萬國並興小大愚智皆願為君智盡而服力屈乃窮非有餘力而屈膝樂為人臣也是以明王聖主放道效天清靜為首和順為常因應為始誠信為元名實為紀賞罰為綱左德右威以應不祥天下仰制莫能毀傷故國可保而民可全也夫德之與兵若天之與地陰之與陽威德文武表裏相當隱之玄域不得已而後行故人君失道好戰自損正事不修邪事作起强大僥奢

紀滅網弛雕琢宮室盈飾狗馬高臺大園聲色在後剗
屠忠諫尊寵姣好簡傲宗廟欺侮諸父殘賊暴虐孤人
推子反逆天地刑戮陰陽黜道德破碎神明和順潰
濁變化不通冬雷夏霜萬物大傷縱橫擊搏謀圖不祥
大國驚怖小國奔亡老弱離散啼哭而行天下憤怨萬
民思兵相率而起我為後行夫何故哉唯彼先祖皆有
神明之德通於天地聖智之勞加於萬民故剖符丹書
受土賜姓列為君王光顯祖考業流子孫是天地之心

萬載之功而繼體者不務屈身厲節摩精鍊神修道行德以奉其先乃忽小善而易小惡日以消息月以陵遲宗廟崩弛國為丘墟族類離散長無所依鬼神孤魂無所棲息乎嗟夫豈不哀哉是以喻我豪俊說我士卒卷甲釋兵且令休息激役心移幸於反覆改過自新變容易則遂往不反為天下賊百姓窮極財殫力屈海內之憂日以長息蒼天降應禍集其國雖欲未誅自然不得天人同心我不能剋故事為而神否身往而志還形反

我志事逆我身悲彼先聖傷彼萬民無罪於天遇此何辜雖曰忽然民命在兵發號申令效以信誠先服者賞後服者傷小下者利大下者昌壞邑者爵降城者封城邑不下未剋勿喪有罪者免有能者官老弱得養死者得葬德澤洽潤恩愛流行慈惠和結衆情發揚默然為之神氣相通彼三軍與我同心姦為我使盜為我工教我以其計慮告我以其地形因彼所有奇變乃通法律不苛險阻虛空天人相得勝出若神前無留敵計謀不

喪敵雖衆多與我構因兩軍相距前若無人我雖萬全敵不可易易敵生姦亡時失利福去禍來為天所疾是故雖獲天祐得人之助猶守之以憂持之以畏出險乘虛宿舍有備休息處便必依水草填隙塞惡與敵相距變運無形竒出無朕錯勝無窮攻戰無有深微宵宵變化無始自我親近不知我之所為彼之知力何得於已故在家者晏然而樂在師者欣然而喜人懷至誠若為其子去家越境若衆趨市疾耕力織暮休早起竒入模

列不敢獨有以供師徒如奉父母懸權爭勝敵人不起
未戰而海內正不攻而諸侯下天地所覆載日月所照
覩皇皇莫莫各安其土夫何故哉慈哀發動因天之心
不敢由於我也

言甚易知篇

夫無形無聲而使物自然者道與神也有形有聲而使
物自然者地與天也神道蕩蕩而化天地默默而告蕩
而無所不化默而無所不告神氣相傳感動相報反淪

虛無甚微以妙歸於自然無所不導故言言之言者自然之賊也為為之為者喪真之數也無為無言者成功之至而長存之要也是以聖人言不言之言為不為之為言以絕言為以止為絕言之道去心與意止為之術去人與智為愚為慧無知無欲無欲則靜靜則虛虛則實實則神動歸太素靜歸自然保身存國富貴無患羣生得志以至長存此言之易知而事之易行者也而天下莫能知莫能行也夫何故哉世主好知務順其心不

觀大道不識自然以為為以言言言息知生事以趣
所安寢以為俗終世被患性變情易深感遠迷精濁神
擾外實內虛強默生咎強靜生患故視之而不見告之
而不聞非以自嫉以為不然夫聖人之言宗於自然祖
於神明常處其反在默言之間甚微以妙歸於自然明
若無見聽若無聞通而似塞達而似窮其事始於自然
流於神明常處其和在為否之間清靜柔弱動作纖微
間易退損歸於無為虛無以合道恬泊以處生時和以

固國立教以畜民養以無欲導以自然贈以天地賜以山川富以年歲貴以有身虞以無憂寧以無患無欲之不得無樂之不存民若無主主若無民忘於智力依道倚天萬國和順并為一君是事之盛而業以隆者也而天下謂之不然夫世之莫我知者非我道小而不足以知也又非我之事薄而不足為也又非世之好敗惡成喜禍樂患而故不我從也天性於我反情欲與我殊智陷於情欲終世溺於所聞神氣不我我而心意不我然

故其明不我能見聰不我能聞是以深言反而受謗大
行遠而得毀獨見之明不用於世獨聞之聰見羞於民
事順神明者不合於俗功配天地者不悅於衆夫至論
大言者總百變要萬方剖判毫釐之內明顯虛無恍惚
之外周密無間歸於泯昧此乃小節之士所不能聞而
隅曲之人所不能逮也夫鴻鵠高飛終日馳騫而不知
宇宙之外制法之人拘教之士累年學問終日談論而
不知道德之大也且神明有所不能領天地有所不能

理況乎守衆庶之論不覩大要之所由不亦宜乎是故
衆俗之所薄賤而得道者之所獨遵也是以聖人知而
弗為能而不任仁義而不以為號通達而不以為名堅
強而不以為顯高大而不以為榮言不可聞動不可形
心若江海志若蒼天廢為以立道損善以益性寂然蕩
蕩莫之能明皎然昭昭莫覩其情頽然默默魁然獨存
薄外厚內賤已卑名去衆離俗與道為常

知不知篇

道德之教自然是也自然之驗影響是也凡事有形聲
取舍有影響非獨萬物而已也夫形動不生形而生影
聲動不生聲而生響無不生無而生有覆不生覆而生
反故道者以無為為治而知者以多事為擾嬰兒以不
知益高年以多事損由此觀之愚為智巧之形也智巧
為愚之影也無為遂事之聲也遂事為無之響也智巧
擾亂之羅也有為敗事之網也故萬物不可和也天地
不可適也和之則失和適之則失適弗和也而後能和

之弗適也而後能適之故安世不知危亂世不知治若影隨形無所逃之也不動求響無所得之也故知而絕知不困於知不知用知亦不困於知其所以不困則異矣而於為不困則一是故聖人操通達之性遊於玄默之野處無能之鄉託不知之體寂若虛空奄忽如死心無所圖志無所治聰明運動光耀四海塗民耳目示以無有庖廚不形聲色不起知故不生禍亂息矣不言而宇內治無為而天下已民俯而無放仰而無效敦慤中

正各守醇性惘惘洋洋皆終天命死者無謚生者無號
若此相繼億萬無量其次情無所樂性無所喜心無所
安志無所利疾不知孝病不知弟既不睹仁又不識義
無有典禮守其真幹一如麋鹿一如鴻鴈不在憂喜亦
不離亂若盲若聾無所聞見主無宮室民無城郭國無
制令世無耻辱病故不病與道相託不言不為威德自
作天地和順渾沌磅礴溷若濁流煥若儼客人物皆愚
歸於寂寞動無形響靜無圻堦生民俱昌天下啞啞亡

於小利而享大福默而治者計不能計而度不能度何以效之夫道德廢淳朴亡奇物並作知故流行禮節起分度明萬物有條貫百事有紀綱封疆畫界治邑屋州鄉里國有忠臣家有孝子錄內畧外雙身為友損彼益此務以相厚疆大重壘小弱亡有郊祀天地名山大水封於太山禪於梁父流漸相承或然或否斷獄萬數黥人滿道臣殺其君子殺其父亡國破家不可勝數天下享其知故之利獲其死亡之咎由此觀之絕知為福好

智為賊亦明矣故使有德之君變志易心生息萬事以教民禱祝請福以至大治者自然不聽也使彼亡國之君廢智去欲絕為止事修道行德棄其心意而欲死亡者形亦不從也是故趨舍廢置王道之形聲也吉凶存亡趨舍之影響也夫聖人所以能動與天和靜與道合既能保身又能全國翱翔乎有為之外優游乎無事之內取福於纖鈔之中而舒之於四海之外喪明者之目杜知者之口窒聰者之耳斬巧者之手與時相隨與和

俯仰不為而自成不教而民治恩加走獸澤及飛鳥者
以其損聰棄智廢為而任道也是以順情從欲窮極心
意動導天地靜陶萬事神靈在已不察不燎身不降席
而萬國自備雖欲不亡自然不置也

民不畏威篇

道德之旨神明之務太和之心天地之意禍莫甚乎亡
福莫甚乎存非獨天道人物亦然故存身之道莫急乎
養神養神之要莫甚乎素然常體憂畏慄慄震震失神

之術本於縱恣喪神之數在於自專故太上畏道其次
畏天其次畏地其次畏人其次畏身昌衰吉凶皆由已
出不畏於微必畏於章患大禍深以至滅亡憂畏元始
至於無形戒慎未兆其道大光動得所欲靜得所安福
祿深微論於無方正言若反明而若昏遼遠潢洋莫之
能聞伺命在我何求於天至福似禍大吉若凶天下醉
飽莫之能明是以世俗見近聞淺不識窅冥之道蔽於
微妙之常塞於神明之理察於毫毛之利不覩丘山之

禍肆情行態無所畏忌言順所然行順所善力能而取
心順妄與僞奢恣睢自專損已忠信所愛欺殆父母侵
凌天地簡傲其主將順情欲以達天道故起巧立名以
代其身施惠流恩以獲大咎遁福天外追患四海福德
求之不能得矣患奔禍馳無所逃矣大威以至乃始為
善當此之時道德不能求天地不能解非天之罪也樂
高喜大負威任勢志憂失畏不求於已也故憂於身者
不恐於人畏於已者不制於彼順於小者不懼於大誠

於近者不悔於遠是以不小其位而居之以敏不薄所
處而厚脩其禮不苦卑微而革其大始不厭困危而絕
其所以樂窮如達安死如壽雖欲且留亦不得久何以
明之莊子曰天地之道始必有終終必有始陽氣安於
潛龍故能鑠金陰氣寧於履霜故能凝冰木善秋毫故
能百尋水樂涓涓故能成海飛禽逸於卵殼故能高翔
羣獸預於胎洮故能遠走是以聖人智達無窮能與天
連變化運動洞於大常猶以積德重厚釋心意隱聰明

憂於溷輓畏於無形竄端匿迹遁類逃情反於虛無歸
於玄冥身重天地而不自高德大陰陽而不自彰託微
處寡後下萬民飲食無味衣服無文方於自飾志不敢
淫秉道操德與物浮沈養民如子遇衆若君德歸之天
功移於人天下辭讓恩厚固深故禍不能禍而患不能
患福不能逃而德不能遁非道有私而天地偏也戒始
慎微和弱忠信奉道順天與物相參憂畏得意安樂困
窮成敗存亡求之於身

勇敢篇

天地之道生殺之理無去無就無奪無與無為為之自然而已正直若繩平易如水因應効象與物俱起損益取舍與事終始深淺輕重萬物自取殊形異類各反其所生為殺元殺為生首二者相形吉凶著矣故知生而不知殺者逆天之道也知殺而不知生者反地之要也故喜怒有分生殺有節受天之殃得地之罰當怒不怒子為豺狼弟為兇虎當鬪不鬪妻為敵國妾為大寇當

殺不殺受天之害為物所制當喜不喜蒙天之災獲地
之咎當生不生人君失國庶人沒命故君子殺民如殺
自活人如活已執德體正不得已而後然存身寧國在
於生殺之間生殺得理天地佑之喜怒之節萬物歸之
故剛柔質直操擊深酷疾邪養正勇敢先失達於守戰
明于開塞長忿美快安靜樂殺便國利民不避彊大威
振百蠻權傾境外得善之半也柔弱畏敬恐情損言深
思遠慮臨正討怨務長寡和博厚積恩利而不害以明

其善與而不奪以顯其名賞而不罰以立其惠生而不殺以成其仁得善之半凡此二功勇敢均計策察馳射身相非與天異意與地異心奮情舒志各肆所安或以千察變為亡虜或以匹夫化為君王故物或生之而為福或生之而為禍或殺之而為福或殺之而為賊二者深微莫能窮測故生之而為福者天下之所佑生之而為禍者天下之所惡也養天下之所惡者傷天下之所佑養天下之所佑者傷天下之所惡一反一覆或為

玄德一覆一反或為玄賊父事天地子孫是得故長養而後世昌者生當生也生物而後亡者生當亡也殺戮而福至者殺當亡也喪物而禍來者殺當生也天之所惡不敢活也天之所佑不敢殺也天之所損不敢與也天之所益不敢奪也是故敢於不敢者之敢動與天同符靜與地同極天心所惡莫之能辨夫天地之道一陰一陽分為四時離為五行流為萬物精為三光陽氣主德陰氣主刑覆載羣類含吐異方玄默無和正直以公

不以生為巧不以殺為工因應萬物不敢獨行吉與之
吉凶與之凶損損益益殺殺生生為善者自賞為惡者
自刑故無為而物自生無為而物自亡影與之交響與
之通不求而物自得不拘而物自從無察而物自顯無
問而物自情故不爭而無所不勝不言而無所不應不
召而無所不來寂然蕩蕩無所不圖惚恍之羅設而無
狀之網施汎淫潢漠遼遠留遲密察無間與物推移故
在前而不可遠在後而不可先靜作而不可聞進退而

不可見終始禍福吉凶自反非出天外莫之能遁也

民不畏死篇

人之情性不知而忠信有知而誕謾得意而安寧失意而圖非窮困而輕死安寧而愛身何以明之莊子曰夫嬰兒未知而忠信於仇讐及其壯大有識欺殆兄嫂三軍失意則下亡虜窮谿之獸不避兇虎其性非易事理然也由此觀之民心不得性命不全則號令不能動也憂愁慘怛樂非輕死則刑罰不能恐也是故好知之君

憂世勞民祭燎天地除禍去患招善請福禱祝鬼神變化萬事動以悅民家知戶辨里有仁賢違天之象專任人心以所見為明以所論為當廢名實背事情道理塞而非譽興天下大擾百姓遑遑勞苦疲極困窮生姦敗者榮而有功輕死者肥而安寧積善者瘦而多憂畏法者飢而多患寡弱者苦而思死衆强者樂而君王是以天下趨名爭勢不計是非析毫剖芒視死如歸乃始告以峻法嚴刑則是禁以所易而制以所輕也故刑戮

並作姦邪不止賞祿施行而大臣不使萬民不附諸侯
不市國非其國身非其身也是以聖人之牧民也人主
無為而民無望民無獲而主無喪也其業易得而難失
也其化難犯而易行也其衣易成而難敝也其食易足
而難窮也故天下除嗜廢欲樂生惡死者皆重其神而
愛其身故刑可制而勢可禁也是以俊雄英豪達道之
人不敢作福不敢起威故法立而不用賞設而不施夫
何故哉身重天地物輕鴻毛法峻嚴刑知不敢淫也是

故帝王之道無事無為目無所見耳無所聽心無所圖
口無所言前後左右各有所任因應以督安其成功授
以所懷歸以所行爵加明主祿施進賢作福者身死竊
威者宗亡百官趨職主無與焉釋臣任主則疏遠隱匿
親近尊顯君道隔塞政事亡矣威嚴而立邪偽並起陪
臣陞進君子得咎君之威勢滅而不揚姦雄豪特令行
禁止百姓冤結萬方失理忠臣悲憂佞巧大喜名實失
當賞罰妄舉是猶使屍起哭而代大匠斲也夫死人無

為而子弟悲者以為死而不為哭也不與方圓而處大
堂者任大匠而身無作也使屍起哭則哭者亡主人代
匠斲則功不成是以明王聖主正身以及天謀臣以及
民法出於臣秉之在君令出於君飾之在臣臣之所名
君之所覆臣之所事君之所謀也臣名不正自喪大命
故君道在陰臣道在陽君主專制臣主定名君臣隔塞
萬物自明故人君有分羣臣有職審分明職不可相代
各守其圓大道乃得萬事自明寂然無事無所不克臣

行君道則減其身君行臣事則傷其國



道德指歸論卷六